

დამტკიცებულია
სსიპ - შოთა რუსთაველის საქართველოს ეროვნული
სამეცნიერო ფონდის გენერალური დირექტორის
2025 წლის 1 ივლისის №91 ბრძანებით

**სსიპ შოთა რუსთაველის საქართველოს ეროვნული სამეცნიერო ფონდისა და ოქსფორდის
უნივერსიტეტის „საქართველოს შემსწავლელი მეცნიერებების“
ერთობლივი კვლევითი პროგრამის საგრანტო კონკურსის პირობები**

მუხლის 1. ზოგადი დებულებები

1. ფონდისა და ოქსფორდის უნივერსიტეტის საქართველოს შემსწავლელი მეცნიერებების ერთობლივი კვლევითი პროგრამის დაფინანსება ხორციელდება საქართველოს სახელმწიფო ბიუჯეტიდან და მის ადმინისტრირებას ახორციელებს ფონდი.
2. ფონდისა და ოქსფორდის უნივერსიტეტის „საქართველოს შემსწავლელი მეცნიერებების ერთობლივი კვლევითი პროგრამის“ საგრანტო კონკურსის პირობები არეგულირებს საგრანტო კონკურსის გამართვის, საკონკურსო განაცხადის შეფასების, გრანტის გაცემისა და შესრულების ანგარიშგების მონიტორინგის საკითხებს.
3. კონკურსის მიზნებია:
 - ა) საქართველოს შემსწავლელ მეცნიერებებში საერთაშორისო სტანდარტების შესაბამისი თანამედროვე დარგობრივი და ინტერდისციპლინური კვლევების განვითარება და პოპულარიზაცია საერთაშორისო ასპარეზზე;
 - ბ) ახალგაზრდა მკვლევართა მოზიდვა და მათი სამეცნიერო პოტენციალის ზრდა, ქვეყნის ისტორიის, კულტურის, დამწერლობის, ენისა და ლიტერატურის, არქეოლოგიისა და ხელოვნების, რელიგიის, სოციალურ - ეკონომიკური, პოლიტიკური ტრანსფორმაციის თანამედროვე კვლევების შედეგების გავრცელება საერთაშორისო აკადემიურ ქსელში;
 - გ) საქართველოსა და რეგიონის შემსწავლელი თანამედროვე კვლევების გამოყენებით თანამშრომლური კონტაქტებისა და კვლევითი კონსორციუმების ჩამოყალიბება, მრავალმხრივი, მდგრადი საერთაშორისო თანამშრომლობის უზრუნველყოფა.

მუხლი 2. კონკურსში მონაწილე სუბიექტები და მონაწილეობის პირობები

1. კონკურსის ფარგლებში ფინანსდება კვლევითი პროექტები ოქსფორდის უნივერსიტეტის ქვეყანათმცოდნეობის ინტერდისციპლინური კვლევების სკოლის, რუსეთისა და აღმოსავლეთ ევროპის კვლევების განყოფილების ყველა სამეცნიერო მიმართულებაში, რომელიც ეხება საქართველოს შემსწავლელი მეცნიერებების მიმართულებით შემდეგ დარგებს: ანთროპოლოგია, სოციოლოგია, ეკონომიკა, პოლიტიკა, საერთაშორისო ურთიერთობები, ისტორია, ხელოვნება, რელიგია, საზოგადოება და კულტურა, ასევე, ბოდლეინის ბიბლიოთეკაში, ოლივერ და მარჯორი უორდროპების კოლექციის კვლევას.
2. ფონდსა და ოქსფორდის უნივერსიტეტს შორის გაფორმებული შეთანხმების შესაბამისად (Letter of Agreement “Visiting Scholars – Georgian Studies Programme”), კონკურსი ითვალისწინებს არაუმეტეს ორი მკვლევრის დაფინანსებას, რომელთაგანაც ერთი მკვლევარი შეირჩევა - სოციალური და ჰუმანიტარული მეცნიერების მიმართულებიდან, მეორე კი - ოლივერ და მარჯორი უორდროპების კოლექციის კვლევების მიმართულებით.
3. სოციალური და ჰუმანიტარული კვლევების მიმართულებით კონკურსში გრანტის მოპოვების მიზნით, პროექტი უნდა წარმოადგინოს საქართველოს მოქალაქე, ფიზიკურმა პირმა, რომელსაც კვლევის შესაბამის სამეცნიერო მიმართულებაში მინიჭებული აქვს დოქტორის ან მასთან

გათანაბრებული აკადემიური ხარისხი არაუადრეს 2019 წლის იანვრისა, ხოლო უორდროპის კოლეჯების კვლევების მიმართულებით - საქართველოს მოქალაქე, ფიზიკურმა პირმა, რომელსაც აქვს დოქტორის ან მასთან გათანაბრებული აკადემიური ხარისხი.

4. საკონკურსოდ წარმოდგენილი პროექტი უნდა ითვალისწინებდეს 12 თვის ხანგრძლივობის კვლევით ვიზიტს ოქსფორდის უნივერსიტეტში.
5. კვლევითი ვიზიტი უნდა დაიწყოს 2026 წლის იანვარში.
6. კვლევითი ვიზიტის ფარგლებში:
 - ა) გრანტის მიმღებ მკვლევარს უნდა ჰყავდეს ოქსფორდის უნივერსიტეტის მიერ შერჩეული მენტორი.
 - ბ) გრანტის მიმღებმა მკვლევარმა მონაწილეობა უნდა მიიღოს ოქსფორდის უნივერსიტეტში გამართულ ღონისძიებებსა და სემინარებში.
 - გ) გრანტის მიმღებ მკვლევარს უფლება აქვს მენტორთან შეთანხმებით მონაწილეობა მიიღოს, როგორც მომხსენებელმა, ოქსფორდის უნივერსიტეტის გარეთ ნებისმიერ ქვეყანაში გამართულ საერთაშორისო სამეცნიერო ღონისძიებებში პროექტით დაგეგმილი კვლევის შედეგების გავრცელებისა და პოპულარიზაციის მიზნებისათვის.
 - დ) გრანტის მიმღებ მკვლევარს უფლება აქვს მენტორთან შეთანხმებით განახორციელოს, ოქსფორდის უნივერსიტეტის გარეთ, ნებისმიერ ქვეყანაში, საველე სამუშაოები პროექტით დაგეგმილი კვლევის მიზნებისათვის.
7. კონკურსის გამარჯვებულმა „მიწვეულმა მკვლევარმა“ უნდა გააფორმოს ხელშეკრულება ოქსფორდის უნივერსიტეტთან კვლევითი პროექტის განხორციელების პერიოდზე.

მუხლი 3. დაფინანსება

1. კონკურსის შედეგად შესაძლოა დაფინანსდეს 2 კვლევითი პროექტი, აქედან ერთი პროექტი - სოციალურ და ჰუმანიტარულ მეცნიერებებში და მეორე პროექტი - ბოძლეინის ბიბლიოთეკის არქივში ოლივერ და მარჯორი უორდროპების კოლექციაზე მუშაობისათვის.
2. თითოეული კვლევითი პროექტისთვის ფონდის საგრანტო დაფინანსება შეადგენს 30 000 დიდი ბრიტანეთის გირვანქა სტერლინგის ეკვივალენტი ლარში.
3. თითოეული მკვლევარისათვის საგრანტო დაფინანსება მოიცავს შემდეგ ხარჯვით კატეგორიებს:
 - ა) მიწვეული მკვლევარის სტიპენდიას - 20 000 დიდი ბრიტანეთის გირვანქა სტერლინგის ეკვივალენტი ლარში;
 - ბ) პროექტის განხორციელების ადმინისტრაციულ ხარჯს - 10 000 დიდი ბრიტანეთის გირვანქა სტერლინგის ეკვივალენტი ლარში.
4. გრანტის მოგების შემთხვევაში, გრანტის მიმღებთან საგრანტო ხელშეკრულების გაფორმების შემდეგ, სტიპენდიის თანხის ჩარიცხვა ხდება გრანტის მიმღების მიზნობრივ ანგარიშზე ვიზიტის დაწყებიდან სამი თვით ადრე, ხოლო ადმინისტრაციული ხარჯებისათვის საჭირო თანხა ირიცხება ოქსფორდის უნივერსიტეტის ანგარიშზე;
5. სტიპენდიის ფარგლებში მკვლევარმა უნდა უზრუნველყოს კვლევით ვიზიტთან დაკავშირებული ნებისმიერი ხარჯი, რომელიც აღიარდება მიზნობრივ ხარჯად ოქსფორდის უნივერსიტეტში კვლევის დასრულების შესახებ წარმოდგენილი ცნობის საფუძველზე.
6. ოქსფორდის უნივერსიტეტში ჩარიცხული ადმინისტრაციული ხარჯი მოხმარდება მიწვეული მკვლევარისთვის უნივერსიტეტის მასპინძელ დაწესებულებაში სამუშაო ადგილის გამოყოფას, კვლევითი და საგანმანათლებლო რესურსების წვდომას და უნივერსიტეტის მიერ შერჩეულ მენტორთან თანამშრომლობას. აღნიშნული ხარჯი აღიარდება ინვოისის საფუძველზე თანხის გადარიცხვისთანავე.

მუხლი 4. საკონკურსო დოკუმენტაცია

1. კონკურსში მონაწილეობის მსურველმა გრანტების მართვის ერთიან სისტემაში GMUS-ში [Grants Management Unified System] ელექტრონულად უნდა დაარეგისტრიროს პროექტი და წარმოადგინოს შემდეგი დოკუმენტაცია:
 - ა) კრებსითი ინფორმაცია პროექტის შესახებ (ნიმუში - დანართი 2, ივსება GMUS-ში პროექტის რეგისტრაციის დროს ქართულ და ინგლისურ ენაზე);
 - ბ) სარეკომენდაციო წერილები 3 რეკომენდატორისაგან (ქართულ და ინგლისურ ენაზე);
 - გ) საპროექტო წინადადება (დანართი 3 - იტვირთება GMUS - ში PDF დოკუმენტის სახით ქართულ და ინგლისურ ენაზე);
 - დ) პროფესიული ბიოგრაფია (CV) (ნიმუში - დანართი 4, ივსება და იტვირთება GMUS-ში ქართულ და ინგლისურ ენაზე);
 - ე) აკადემიური ხარისხის დამადასტურებელი დოკუმენტი. თუ აკადემიური ხარისხის დამადასტურებელი დოკუმენტი უცხოეთშია გაცემული, მას თან უნდა ერთოდეს უცხოეთში მიღებული განათლების აღიარების დოკუმენტი, გაცემული „სსიპ - განათლების ხარისხის განვითარების ეროვნული ცენტრის მიერ. საბჭოთა კავშირის არსებობის პერიოდში გაცემულ დოკუმენტს არ სჭირდება ქართული თარგმანი და აღიარება. დოკუმენტები იტვირთება GMUS-ში შესაბამისი პირის „მეცნიერის პროფილში“ PDF დოკუმენტის სახით.
2. საგრანტო კონკურსში მონაწილეობისათვის აპლიკანტმა ფონდის კანცელარიაში უნდა წარმოადგინოს ხელმოწერით დამოწმებული „განცხადება კონკურსში მონაწილეობის შესახებ“ (ნიმუში - დანართი 5, გენერირდება GMUS-ით).
3. საკონკურსო დოკუმენტაცია წარმოდგენილი უნდა იყოს ამ ბრძანებით დამტკიცებული წესების, ფორმებისა და ვადების დაცვით.

მუხლი 5. კონკურსზე რეგისტრაციის წესი

1. კონკურსში პროექტის რეგისტრაცია ხორციელდება ორ ეტაპად:
 - ა) ელექტრონული რეგისტრაცია – 2025 წლის 5 აგვისტო - 17:00 საათამდე
 - ბ) ფონდის კანცელარიაში რეგისტრაცია – 2025 წლის 8 აგვისტო -17:00 საათამდე
2. ელექტრონული რეგისტრაციის ეტაპი გულისხმობს საკონკურსო დოკუმენტაციის ატვირთვას GMUS-ში შემდეგ ბმულზე: <http://gmus.rustaveli.org.ge> ელექტრონული რეგისტრაციისათვის საჭიროა:
 - ა) კონკურსში მონაწილე ფიზიკური პირის რეგისტრაცია GMUS-ში – „მეცნიერის პროფილის“ შექმნა და კონკურსის პირობების მე-4 მუხლის 1-ლი პუნქტის ე-ქვეპუნქტით გათვალისწინებული აკადემიური ხარისხის დამადასტურებელი დოკუმენტის ატვირთვა.
 - ბ) კონკურსზე პროექტის რეგისტრაცია, კრებსითი ინფორმაციის შევსება და საკონკურსო დოკუმენტაციის ატვირთვა (იხ. კონკურსის პირობების მე-4 მუხლის 1-ლი პუნქტის ბ, გ და დ ქვეპუნქტები).
3. ფონდის კანცელარიაში რეგისტრაციის ეტაპი გულისხმობს კონკურსში მონაწილეობის შესახებ განცხადების წარმოდგენას ფონდის კანცელარიაში კონკურსის პირობების მე-4 მუხლის მე-2 პუნქტით დადგენილი წესის შესაბამისად.
4. საკონკურსოდ განიხილება მხოლოდ ის პროექტი, რომელსაც დადგენილი ვადებისა და წესების დაცვით გავლილი აქვს ელექტრონული რეგისტრაცია და ფონდის კანცელარიაში წარმოდგენილი აქვს შესაბამისი „განცხადება კონკურსში მონაწილეობის შესახებ.“
5. ფონდი უფლებამოსილია კონკურსის ნებისმიერ ეტაპზე კონკურსიდან მოხსნას პროექტი რომელიც წარმოდგენილია კონკურსის მიზნებთან შეუსაბამოდ, ან წარმოდგენილია არასრულად, ან შეიცავს ყალბ ინფორმაციას, ან წარმოდგენილია დადგენილი ფორმებისა და ვადების დარღვევით.
6. ფონდი არ ანაზღაურებს პროექტის მომზადებისა და წარდგენისათვის გაწეულ ხარჯებს.

მუხლი 6. კონკურსის ადმინისტრირების ეტაპები

1. კონკურსის ადმინისტრირების ეტაპები:
 - ა) კონკურსის გამოცხადება
 - ბ) საგრანტო პროექტების რეგისტრაცია;
 - გ) რეგისტრირებული პროექტების კონკურსის პირობებთან შესაბამისობის დადგენა;
 - დ) პროექტების შეფასება ფონდისა და ოქსფორდის უნივერსიტეტის ერთობლივი კომისიის მიერ (საგრანტო განაცხადის შეფასება, გასაუბრება);
 - ე) კომისიის შეფასების საფუძველზე გამარჯვებული პროექტების გამოვლენა და ფონდის გენერალური დირექტორის ინდივიდუალური ადმინისტრაციულ-სამართლებრივი აქტით დამტკიცება;
 - ვ) საგრანტო ხელშეკრულებების გაფორმება და გრანტის გაცემა;
2. კონკურსზე რეგისტრირებული პროექტების კონკურსის მიზნებისათვის დადგენილ მოთხოვნებთან შესაბამისობის შემოწმების მიზნით ფონდი ჩაატარებს წარმოდგენილი დოკუმენტაციის ტექნიკურ ექსპერტიზას, რომლის ფარგლებშიც დაადგენს ხარვეზს და იმოქმედებს კანონის შესაბამისად.

მუხლი 7. პროექტების შეფასება და გამარჯვებულების გამოვლენა

1. პროექტებს აფასებს ფონდის გენერალური დირექტორის ინდივიდუალური ადმინისტრაციულ-სამართლებრივი აქტით შექმნილი ფონდისა და ოქსფორდის უნივერსიტეტის ერთობლივი საკონკურსო კომისია.
2. პროექტების შეფასდება ხორციელდება ორ ეტაპად:
 - ა) ეტაპი 1 - საკონკურსო განაცხადის შეფასება;
 - ბ) ეტაპი 2 - გასაუბრება საკონკურსო კომისიასთან.
3. პროექტების შეფასების კრიტერიუმებს ადგენს ერთობლივი საკონკურსო კომისია.

შეფასების ორივე ეტაპზე კომისია ხელმძღვანელობს შემდეგი კრიტერიუმების მიხედვით:

კრიტერიუმი	შეფასება
კვლევითი პროექტის თემატიკის შესაბამისობა მასპინძელი სკოლის კვლევის სფეროებთან	მინიმუმ 1 მაქსიმუმ 5
გამორჩეული კვლევა	მინიმუმ 1 მაქსიმუმ 5
სამეცნიერო ეფექტიანობა	მინიმუმ 1 მაქსიმუმ 5
მიწვეული მკვლევრის კომპეტენცია	მინიმუმ 1 მაქსიმუმ 5
განხორციელებადობა	მინიმუმ 1 მაქსიმუმ 5
ჯამური ქულა	მინიმუმ 5 მაქსიმუმ 25 ქულა

4. შეფასების პირველ ეტაპზე თითოეული კრიტერიუმი ფასდება 5-ქულიანი სისტემით (1-5), ჯამური მაქსიმალური შეფასება არის 25 ქულა. კრიტერიუმებში ქულებით შეფასება განიმარტება შემდეგნაირად:

ქულა	შეფასება
5	საუკეთესო
4	ძალიან კარგი
3	კარგი
2	დამაკმაყოფილებელი
1	სუსტი

- შეფასების მეორე ეტაპზე გადასვლისათვის აუცილებელი პირობაა შეფასების პირველ ეტაპზე პროექტმა მიიღოს 3 ან მეტი ქულა ნებისმიერ კრიტერიუმში.
- მეორე ეტაპის შეფასების საფუძველზე კომისია ადგენს რანჟირებულ სიას, ადგენს გამარჯვებულს და დასამტკიცებლად წარუდგენს გენერალურ დირექტორს.

მუხლი 8. საგრანტო ხელშეკრულება

- ფონდის გენერალური დირექტორის მიერ გამარჯვებული პროექტების დამტკიცების შემდეგ ფონდი უზრუნველყოფს საგრანტო ხელშეკრულების გაფორმებას კონკურსში გამარჯვებული პროექტის წარმდგენ მეცნიერთან.
- საგრანტო ხელშეკრულება პროექტის განხორციელების სხვა პირობებთან ერთად ითვალისწინებს პროექტის ფარგლებში შექმნილი ინტელექტუალური საკუთრების უფლებით სარგებლობას გრანტის მიმღებსა და გრანტის გამცემს შორის საქართველოში მოქმედი და საერთაშორისო კანონმდებლობის შესაბამისად.

მუხლი 9. საგრანტო ხელშეკრულების შესრულების მონიტორინგი

- საგრანტო ხელშეკრულებით გათვალისწინებულ ტრანშს ფონდი რიცხავს ავანსის სახით.
- ფონდი ახორციელებს დაფინანსებული პროექტების საგრანტო ხელშეკრულების შესრულების მონიტორინგს (შემდგომში - მონიტორინგი), რომლის დროსაც განიხილავს გრანტის მიმღების მიერ წარმოდგენილ შუალედურ და საბოლოო ანგარიშებს და ადგენს შესაბამის განხილვის აქტს.
- მონიტორინგის მიზნებისათვის გრანტის მიმღები ვალდებულია ფონდს წარუდგინოს პროექტის განხორციელების ანგარიში ფონდის გენერალური დირექტორის მიერ დამტკიცებული ფორმით.
- გრანტის მიმღები ვალდებულია ფონდში წარადგინოს შუალედური ანგარიში კვლევითი ვიზიტის დასრულებიდან არაუგვიანეს 30 დღისა, ხოლო საბოლოო ანგარიში კვლევითი ვიზიტის დასრულებიდან 1 წლის განმავლობაში.
- პროგრამული და ფინანსური მონიტორინგის წესი დეტალურად განისაზღვრება ფონდსა და გრანტის მიმღებს შორის გაფორმებული საგრანტო ხელშეკრულებით.
- ფონდის გენერალური დირექტორი ინდივიდუალური ადმინისტრაციულ-სამართლებრივი აქტით ამტკიცებს პროექტის განხორციელების პროგრამული და ფინანსური ანგარიშის ფორმებს;
- შუალედური და საბოლოო ანგარიშის განხილვისას საგრანტო პროექტით გათვალისწინებული ვალდებულებების შეუსრულებლობის შემთხვევაში გრანტის მიმღებს განესაზღვრება ხარვეზის გამოსწორების გონივრული ვადა. საგრანტო ხელშეკრულებაში ცვლილების განხორციელება შესაძლებელია გრანტის მიმღების მიერ წარმოდგენილი დასაბუთებული წერილობითი მოთხოვნის საფუძველზე. მოთხოვნილი ცვლილება უნდა იყოს დაკავშირებული პროექტით გათვალისწინებულ მიზნებსა და ამოცანების შესრულებასთან.

მუხლი 10. პროექტის შეჩერება, შეწყვეტა და დასრულება

პროექტის შეჩერება, შეწყვეტა და დასრულება რეგულირდება საქართველოს განათლებისა და მეცნიერების მინისტრის 2015 წლის 26 ნოემბრის N156/ნ ბრძანების მე-15 მუხლის შესაბამისად.

მუხლი 11. დამატებითი მოთხოვნები გრანტის მიმღებთა მიმართ

გრანტის მიმღები ვალდებულია, საგრანტო ხელშეკრულების მოქმედების პერიოდში განახორციელოს ქვემოთ ჩამოთვლილი მოთხოვნებიდან ერთ - ერთი:

1. ვიზიტის დაწყებიდან 2 წლის განმავლობაში პროექტით გათვალისწინებული კვლევის მასალებზე დაყრდნობით დამოუკიდებლად ან თავიანთი უშუალო მენტორის თანაავტორობით გამოაქვეყნოს ორი სამეცნიერო სტატია რეფერირებად და ციტირებად გამოცემებში. თუ გამოაქვეყნება სცდება 2 წელს, ამ შემთხვევაში მისაღები იქნება წარმოდგინოს ცნობა, რომ სტატია მიღებულია და ჩაშვებულია გამოსაქვეყნებლად და სტატიის PDF ვერსია. მკვლევრების ნაშრომები უნდა იყოს გაგზავნილი და მიღებული იმ ჟურნალებში, რომლებიც ინდექსირებულია შემდეგ რეიტინგებსა და ბაზებში: Scimago Journal Ranking; Elsevier (Scopus და Science Direct) Web of Science და ERIH plus.
2. ვიზიტის დაწყებიდან 2 წლის განმავლობაში გამოაქვეყნოს მონოგრაფია საქართველოში შესაბამისი უმაღლესი საგანმანათლებლო დაწესებულების სამეცნიერო საბჭოს დასკვნისა და რეკომენდაციის საფუძველზე. იმ შემთხვევაში, თუ მონოგრაფიის გამოცემის თარიღი გადააჭარბებს 2 წლიან ლიმიტს, მისაღები იქნება გამომცემლობის სარედაქციო კოლეგიის წერილი, რომელიც ადასტურებს, რომ მონოგრაფია მიღებულია და ჩაშვებულია გამოსაცემად. გრანტის მიმღები ვალდებულია გამოაქვეყნებულ მონოგრაფიასთან ერთად ფონდში წარმოდგინოს მონოგრაფიის PDF ვერსია.
3. მოწვეული მკვლევარისთვის, რომელიც მუშაობს ბოდლეინის კოლეჯში ადიარებულია, რომ კვლევის მნიშვნელოვანი შედეგები მოიცავს ნაკლებად ტრადიციულ შედეგებს მათ შორის გამოფენებს, სპექტაკლებს, ციფრულ და ვიზუალურ მედიას და ვებ-კონტენტს. ორიგინალური კვლევების შემცველი სამუშაოს პორტფოლიოს გარდა კვლევითი ვიზიტის დაწყებიდან ორი წლის განმავლობაში, მოწვეული მკვლევარი ვალდებულია ერთი რეცენზირებული სამეცნიერო (ინგლისურ ენაზე) ნაშრომის, როგორც წიგნის თავის სახით გამოაქვეყნებაზე.
4. საგრანტო პროექტის ფარგლებში განხორციელებული კვლევის შედეგების ამსახველ პუბლიკაციებში (სტატია, მონოგრაფია, საკონფერენციო აბსტრაქტი და ა.შ) (ასეთის არსებობის შემთხვევაში) სავალდებულოა, მითითებული იყოს, რომ კვლევა განხორციელდა „შოთა რუსთაველის საქართველოს ეროვნული სამეცნიერო ფონდის მხარდაჭერით [გრანტის ნომერი ...]“ / „This work was supported by Shota Rustaveli National Science Foundation of Georgia (SRNSFG) [grant number ...]“.
5. საგრანტო პროექტის ფარგლებში შექმნილ ვიზუალურ პროდუქციაზე, ასეთის არსებობის შემთხვევაში (ნაბეჭდ, ფოტო, აუდიო, ვიდეო, ელექტრონულ პროდუქციაზე და ვებგვერდზე) სავალდებულოა განთავსდეს შოთა რუსთაველის საქართველოს ეროვნული სამეცნიერო ფონდის ლოგო და მითითებული იყოს, რომ საგრანტო პროექტი განხორციელდა “შოთა რუსთაველის საქართველოს ეროვნული სამეცნიერო ფონდის მხარდაჭერით”.
6. ფონდი უფლებამოსილია გრანტის მიმღებთა მიერ წარდგენილი პროექტის აბსტრაქტი, პროგრამული ანგარიშები და ბეჭდვითი ან/და ვიზუალური მასალები გამოიყენოს საკუთარი საქმიანობის ანგარიშში, ბეჭდვით და ელექტრონულ გამოცემებში, განათავსოს ფონდის ვებგვერდზე.
7. ოქსფორდის უნივერსიტეტი შოთა რუსთაველის საქართველოს ეროვნულ სამეცნიერო ფონდს წარუდგენს ყოველწლიურ ანგარიშს მოწვეული მკვლევრის შესახებ, რომელიც მოიცავს ინფორმაციას ოქსფორდის მიერ დამტკიცებული საველე პერიოდისა და სამეცნიერო ღონისძიებების დეტალების შესახებ, რომელსაც ადგილი ექნება ოქსფორდის გარეთ. თითოეული მენტორი ანგარიშში შეიტანს მკვლევრის დახასიათებას.

8. მკვლევრებს მოეთხოვებათ ჩაატაროს თავისი კვლევის პრეზენტაცია საჯარო სემინარზე, მათი ოქსფორდში ვიზიტის განმავლობაში.
9. ამ მუხლის პირველი და მეორე პუნქტებით გათვალისწინებული ვალდებულებები ეხება ჰუმანიტარულ-სოციალური მიმართულებების მეცნიერებს, ხოლო მესამე პუნქტით გათვალისწინებული ვალდებულებები კი მარჯორი და მარგარეტ უორდროპების მიმართულების მეცნიერებს.